



UPA15/91  
Nuuk 17. marts 2015  
Juliane Henningsen

**Siunnersuut uunga: Tuniniaanissamik nittarsaassisarneq aamma nalunaaqutsersuisarneq pillugu Inatsisartut inatsisaat nr. xx, xx 2015-imeersoq** (tuniniaanissamik nittarsaassisarnermut inatsit).  
(Inuussutissarsiornermut, Suliffeqarnermut, Niuernermut Nunanullu Allanut Naalakkersuisoq)

Nunatsinni atuisartut pisisartullu ataqqillugit niuertarfiutalik niuertariaqarpoq. Taamaammatt niuertut inatsisitigut ersarissunik malitassaqartariaqarput, pisisartut atuisullu illersorniarlugit.

Tuniniaaneq nittarsaassinerlu ullut tamaasa takussaapput, naqitani agguaassani, internet-ikkut sarsuatitatut allarpassuartigullu nittarsaassineq ingerlanneqartarpoq. Inatsisissami ersarissarneqarpoq pisisartut atuisullu pisinnaatitaaffeqartut ussassaarinermi inuussutisarsiummik ingerlataqartunit saaffigeqqunnginnissamik periarfissaqarnerat, tamanna isumaqatiginaqaaq.

Maannamut atuuttuusimasoq Atuisartunut Siunnersuisooqatigiit atorunnaarsinneqassaaq taarsiullugulu Atuisartunut Pisisartunullu Maalaaruteqartarfittut Ataatsimiititaliaq pilersinneqassalluni. Inatsisissami saqqummiunneqarnerani aalajangiisarnerit sukkasuumik pisarnissaat ilimasaarutigineqarpoq.

Inatsisissatut siunnersuummi §8. ima siunnersuutaavoq: "Allaganngorlugu ussassaarineq, allagartalersuineq aamma inini tamanit orninneqarsinnaasuni tuniniaanissamik nittarsaassineq sapinngisaaq tamaat kalaallisut pissaaq." Inatsit taamatut paragraffitalik ersarissunik malitassiarineqartariaqarpoq. Taamaattumik apeqquserparput oqaatsitta pisortatigoortumik oqaaserineqartut taamak nukilaatsigisumik inissinniarneqarmata. Oqaasermi "sapinngisamik" assigiinngitsorpassuarnik paasineqarsinnaavoq. Oqaatsitta aammalu innuttaasut maani aallaavigineqarnissaat piumasaaqatigaarput. Tusarniaanermi akissutit ilaatigut piviusorsiunngitsunik ilimasaarutinik imallit tunngavigiinnarlugit oqaatsitigut piumasaaqatit sakkukillineqassanngitsut Inuit Ataqatigiit isumaqarput.

§ 8-mut oqaasertaliussat aaqinneqarnissaanni siunnersuutigaarput: "Allaganngorlugu ussassaarineq, allagartalersuineq aamma inini tamanit orninneqarsinnaasuni tuniniaanissamik nittarsaassineq minnerpaamik kalaallisut pissaaq." Taamatut oqaasertaliineq oqaatsinut allanut mattussinngilaq, qulakkeerinnipporli maani oqaatsinik atorineqartunik atuinissamik.

Niuertarfiutillit allatullu aningaasarsiortut maallatigaat kalaallisut allagartalersuisariaqalerneq aningaasartuutaassasoq, tamanna ilumoorpoq, soorunami. Siunnersuut annertuunik aalajangersakkanik imaqarpoq, ilaatigut meeqqanut inuusuttuaqqanullu nittarsaassinermi saaffiginnittarneq pillugu immikkuullarissunik atuutsitsisoqalissaq.

Maleruagassat uku atuutilerpata naatsorsuutigineqassaaq niuertarfiutillit inatsisinik unioqqutitsisut tamanut saqqummiunneqartalersinnaanerit, tamatumani pisisartunut ersarissunik nalunaarneq pissaaq taamalu pisisartut inatsisitigut ingerlatsilluartunik niueqateqarnissartik toqqarsinnaassavaat.

Nalilersorluarneqartariaqarpoq, Atuisoq – atuisullu siunnersuisooqatigiiffiata atorunnaarneri isumatusaarnerunersut, ilaatigummi sipaarutigineqartut 225.000 kr. suliap pingaaruteqassusaanut sanilliullugit annikiginarput.

Suliassaq pingaarutilik naammassineqarpat pingaaruteqarpoq inatsimmik nutaamik atuutsitsilernissami innuttaasut pisinnaatitaaffimminnik ilisimaarinninnissaat. Naalakkersuisut tamannattaq isigalugu sulisariaqarput.

Inatsisissatut siunnersuut inuussutissarsionnermut ataatsimiititaliamut suliarineqassasoq innersuussutigaarput.